

Riquer

I.
Breu vers per tal que meins i poing
fatz e que sia ben apres,
q'ieu sui trobare, mas non ges
de celz rics qe·is fant auzir loing;
e s'anava mos chans tro lai
don la razons ven a mi sai,
ja non volria plus anes.

II.
De trop ric'amor non ai soing,
sol de mon partage n'agues,
qe·l poders ni·l semblans non es
en mi ni fu faitz de tal coing
d'enquerre ric joi, ni s'eschai,
ni devenur que ben o sai
no·m poiria qan be·i poignes.

III.
Mais dei doncs amar e mon poing
un bel auzellet q'ieutengues
c'al cel doas gruas o tres,
per q'ieu non prec ni non somoing
d'amar dompna s'a far non fai;
ja·l fol cabrier non semblerai
qu'enquis qe·il reina l'ames.

IV.
Las ricas c'una non caloing
lais als rics donadors cortes,
c'una besseta m'a conques,
tal que de Paris tro al Groing
gensser non es ni mieills no·ill vai
a nuilla de fin pretz vrai
ab lo poder qui·l ten en pes.

V.
Ad aquesta soplei e joing
mas mans per referre merces,
que la benanansa on m'a mes
mi val mais e ges no·m vergoing

si trop rica dompna non ai,
que·l sens e la beaultz l'estai
tant aut que paucas li son pres.

VI.

De ma ricor, ni meins ni mai,
am e conosc que mieills m'estai
que is trop autamen ames.

- letto 500 volte

Credits | Contatti | © Sapienza Università di Roma - Piazzale Aldo Moro 5, 00185 Roma T (+39) 06 49911
CF 80209930587 PI 02133771002

Source URL: <https://letteraturaeuropea.let.uniroma1.it/?q=laboratorio/riquer-0>